



Somma Märchen 2015

„Auf geht's, daaß si wos riad“

A Somma-Märchen war des heier -
Gau-Trachtnfest und Jubiläumsfeier.
120-Jahr Trachtnvarein Prean,
so haben mir des Gern!

Wenn des net koa Grund waar zum Feiern
und dann no bei uns do in Bayern!
Wos passat do besa, wias war,
no 's Gaufest dazua, is klar!

De Preana haben aufzoagt, net schlecht,
daaß a Net-Preana glei neidig sei mecht.
Vo Anfang o und bis zum End
hots passt, wia ma des seltn kennt.

Wos ma do ganz bsondas gfoid,
der beispuilose Zsammahoid!
Ma ko net oanzle außahebn,
a Jeds hod do sei Bestes gebn!

Ob Schauspuia, ob Helfasleit,
ob Festleitung, nix hod se gfeit!
Ma ko scho sogn, do macht des Spaß,
aa wenn Arbat war - a Maaß.

Und dazua dann aa no des Wedda,
des bissal Regn, manch Dog, des stört do neda.
Am Festdog war nua Sonnaschei,
es kunnt ja gor net scheena sei!

Und eigentlich wars gor net hoäß.
Hob fast net gschwitzt, so vui i woäß,
beim Festzug. Der war ziemli lang,
a siebn-acht Kilometa Gang.

Und aa da Festobnd war spitz!
Vui war gebotn, griabig, mit vui Witz.
De Schauspui-Traachtla haben Talent,
Wia mas bei Lain seltn kennt.

De ganze Festwoch, ko ma sogn,
duad a ganz a großes Lob vatrogn!
De Freid da Traachtla hot ma gspüat,
noch dem Motto:
„Auf geht's, daaß si wos riad“

Ernst Reiter